

Aalisarnermi aningaasalersuineq pillugu inatsisartut inatsisaannik Namminersorlutik Oqartussat nalunaarutaat

Matumuuna Aalisarnermi aningaasalersuineq pillugu Inatsisartut inatsisaanni nr. 15, 20. november 2006-imeersumi, Inatsisartut inatsisaanni nr. 11 5. december 2008-meersumi, Inatsisartut inatsisaanni nr. 13, 2. december 2009-imeersumi, Inatsisartut inatsisaanni nr. 22, 22. november 2011-imeersumi, Inatsisartut inatsisaanni nr. 8, 3. december 2012-imeersumi, kiisalu Inatsisartut inatsisaanni nr. 26, 9. december 2015-meersumi allannguutitalinni nalunaarutigineqarput.

Kapitel 1

Aalisarnermi aningaasaateqarfimmik pilersitsineq.

§ 1. Aalisarnermik inuussutissarsiutip siuarsaaviginissaanut tapiissuteqartarnissaq, tassunga ilanngullugit ingerlatserusuttunut nutaanut piuminarnerusumik periarfissiisoqarnissaa kiisalu aalisariutit nutarteriffigineqarnissaannut tapersiisarnissaq Inatsisartut inatsisaanni siunertaavoq.

Imm. 2. Inatsisartut inatsisaat aalisarnermik inuussutissarsiornerup inuiaqatigiinni sapinngisamik annertunerpaamik iluanaaruteqarnissaanut peqataassaaq, ilanngullugu aalisarnermi naammassisaqarsinnaassuseq, unammillersinnaassuseq aamma aalisakkanik pisuussutinik aalisarsinnaassutsip ingerlaavartumik naleqqussarsinnaanera pitsaanerulersillugu kiisalu kalaallit nunaanni aalisarnermut iluaqutaasumik nutarterinerit siuarsarlugit.

Imm. 3. Aalisarnermut aningaasaateqarfimmut aningaasaliinerit aningaasanut inatsimmi immikkoortinneqartassapput kiisalu aalisarnermi aningaasaateqarfimmiileqqaarneqarlutik.

Kapitali 2

Sumiiffiit atuiffusut

Ingerlaavartumik taarsersuinernut nutarterinernullu tapiissutit

§ 2. § 2. Naalakkersuisut sinerissami qanittumi aalisariutit teknikkikkut pisoqaassutsikkullu ajorsiarthonerat malillugu ingerlaavartumik taarsersornerannut nutarternerannullu tapiissuteqarsinnaapput.

Imm.2. Taamaallaat tapiissuteqartoqarsinnaavoq angallatinik nutaanik atornikunillu pisinernut inuussutissarsiornermi atorneqarsinnaasutut akuerisaasunut aammalu siunissami sivirusunerusumi aalisarluarsinnaassuseq ingerlatiinnarumallugu aalisarluarsinnaasutut nutaaliaasutullu nalilerneqartunut.

Imm. 3. Imm. 1 naapertorlugu sinerissap qanittuani aalisarnermi aalisariutinik ingerlaavartumik taarsersuinermi nutarterinermilu ilaapput teknikkikkut atortut, sillimaniarnermi atortut, teknikkikkut atortut allat, aalisarnermi atortut atortullu tamakku assigisaat, suliniullu piviusunngortinniarlugu teknikkikkut aningaasatigullu pisariaqartumik siunnersorneqarneq.

Suliniutinut nutaaliorfusunut tapiissutit

§ 3. § 3. Kalaallit Nunaata aalisarnikkut pisuussutaanik ineriartortitsinermit taakkuninngalu atuinermut iluaqutaasutut nalilerneqartunut ingerlatsinissamut, misiliutigalugu nutaanik suliniutinik pilersitsinerlut, misileraalluni aalisarnerlut assigisaasalunniit, naammassineqarnissaannut Naalakkersuisut tapiissutinik tunniussisinnaapput, uku ilanngullugit:

- 1) Imartap aalisarnikkut periarfissaanik, immikkut aalisagaqarneranik aamma aalisarnerup allanngortinneqarsinnaanerani periarfissanik misissuinerlut.
- 2) Aalisarnermi atortunik pitsanngorsaaneq naammassisaqarnerulersitsinerlu, aalisariaatsinik allanik misileraaneq sungiusarnerlu.
- 3) Ataavartitsiniarluni suliniutinik killilersuinermilu periutsinik misileraanerit, tamatumunnga ilanngullugit aalisarnermi atortunik immikkoortiterisinnaasunik qajassuussisinnaasunillu inerisaaneq misileraanerlu.
- 4) Aningaasaqarnikkut iluanaaruteqarnerup pitsaanerulernissaa siunertaralugu tunisassianik aamma tunisassioriaatsinik pioreersunik inerisaaqqinnerit pitsanngorsaaqqinnerillu.
- 5) Aalisakkanik tukertitsivinnik pilersaarusiornissamut misissuinerit ineriartortitsinermilu suliniutit.

Kapitel 3

Qinnuteqarneq

Qinnuteqaatit imaat

§ 4. §-it 2 aamma 3 naapertorlugit tapiiffigineqarnissamut qinnuteqaammi suliniummik allaaserisaq ukuninnga imalik ilanngunneqassaaq:

- 1) Pilersaarutip siunertaanik isumaanillu nalunaarut.
- 2) Ingerlatsinermi aningaasaqarnermilu missingersuutit tapiiffigitinnissamut pisariaqartinneqartut amerlassusiinik nalunaarutitallit.
- 3) Suliniummi peqataasunik piginnittunillu tamanik allaaserinninneq.
- 4) Suliniummik aqutsineq aqutsisullu pisinnaasaannik allaaserinninneq.
- 5) Suliniutip naammassineqarnissaanut piffissalersuut.
- 6) Teknologi, atortut, tunisassiornermi atortut angallallu atorineqartussatut kissaatigineqartoq pillugit pingaarnersiorlugit allaaserisaq.
- 7) Pilersaarummi tunisassianik tunitsiviit aqutigineqartussat pillugit allaaserisaq.

Qinnuteqaammut uppersaatinut piunasaqaatit

§ 5. § 5. §-it § 2 aamma 3 naapertorlugit tapiiffigineqarnissamik qinnuteqaammut uppersaatit ilanngunneqassapput, taassuma ataani ukununnga uppersaatit:

- 1) Pisassiissutitut, aalisarsinnaanermut akuersissutitut imaluunniit akuersissutitut pisariaqartunut piunasaqaataasoq inatsit una malillugu aningaasatigut tapiiffigineqarnissaq.
- 2) Avataanit atortitsisartut aningaasaliisinnaanerannik neriorsuut imaluunniit pilersaarutip aningaasartuutitassai tamaasa eqqarsaatigalugit §§ 7, imm. 1 aamma § 8 imm. 1 malillugit nammineq aningaasaliisinnaaneq.
- 3) Suliffeqarfimmik isumaqatigiissutitillu tassunga atasunik piginnittuuneq.
- 4) Inuussutissarsiornermut pisortanit taarsigassarsiat.

Kapitel 4

Tapiissutitik tunniussineq

§ 6. § 2 naapertorlugu tapiissutitik qinnuteqaatip nalilersornerani, suliniut tamaat isigalugu nalinginnaasumik aningaasatigut angusassatut ilimagineqarsinnaasut tunngavigalugit Naalakkersuisut suliniummik naliliissapput.

Imm.2. § 3 naapertorlugu tapiissutitik qinnuteqaatip nalilersornerani, suliniut tamaat isigalugu suliniummi pineqartumi siunissami kalaallit aalisarnermik inuussutissarsiorneranni periarfissatut ilimagineqarsinnaasut aallaavigalugit Naalakkersuisut nalilersussapput.

Imm. 3. Naalakkersuisut §-it 2 aamma 3 malillugit tapiissutisissamik qinnuteqaatit nalilersornerini, ilaatigut qinnuteqartoq siusinnerusukkut tapiissutisissamanersoq, siusinnerusukkut tapiissutisinnermi piunasaqaatinik sumiginnaasimanersoq, imaluunniit pisortanit inuussutissarsiuutinut taarsigassarsianik sumiginnaasimanersoq pingaarutilittut nalilersinnaavaat.

§ 7. § 2 naapertorlugu Naalakkersuisut makkununga tapiissuteqarsinnaapput:

- 1) Raajarniarnermi pisinerup nalingata tamarmiusup 10%-ia angullugu.
- 2) Raajat aalisarnerisa saniatigut aalisarnerni allani pisinerup nalingata tamarmiusup 40%-ia angullugu. Ilanngullugulu piginnittut 20 %-mik tapiiffigineqarlutik angallammik pisaarsimasut qinnuteqaqqinnermi 20 %-mik tapiiffigineqaqqissinnaapput. 20 %-mik qaffaaqqinneq atortussanik piniarnermi atunngilaq.

Imm. 2. Imm.1 malillugu pisinnermi nalinganut tamarmiusumut ilaapput:

- 1) Angallat teknikkikkut pisariaqartunik ikkussuiffigineqarsimasoq.
- 2) Isumannaallisaanermut atortut.
- 3) Teknikkikkut ikkussukkat allat.
- 4) Aalisarnermut atortut ingerlatsinernullu atortut tamakkununga assingusut allat.
- 5) Suliniutip naammassineqarnissaanut teknikkikkut aningaasaqarnikkullu siunnersuinerit pisariaqartinneqartut.

Imm. 3. Naalakkersuisut, Imm. 1-mi aalajangersakkat saneqqullugit Qaanaamut Qaasuitsup Kommuniameersumut aamma Tasiilamut Kommuneqarfik Sermersuumeersumut tapiissuteqarnissamut immikkut annertussusiliillutillu piunasaqaasorsinnaapput.

§ 8. § 3 naapertorlugu suliniutinut nutarterisunut Naalakkersuisut suliniummi aningaasartuutit affai angullugit tapiisinnaapput.

Imm. 2. Imm. 1. naapertorlugu suliniummi aningaasartuutinut ilaapput:

- 1) Misissuinerit.

- 2) Pisiat, kisianni angallatit, illut atortullu aalajangersukkat allat pinnagit.
- 3) Teknikimut, aningaasanut uumassuseqassutsimullu tunngasunik siunnersuinerit.

Nammineq aningaasaliissutit

§ 9. Naalakkersuisut tapiisinnaapput piumasaralugu qinnuteqartup nammineq aningaasaliissutini uppernarsassagai.

Imm. 2. Nammineq aningaasaliissutit isigineqarput:

- 1) Aningaasat tigoriaannaat.
- 2) Pigisat § 7, imm. 2 malillugu pisianut tamarmiusunut ilaasut.
- 3) Pigisat § 8, imm. 2, nr. 2 malillugu suliniummi aningaasartuutitut ilaasut.

Imm. 3. § 7, imm. 1, nr. 2 malillugu sulit allanik tapiissuteqarnermi 10 %-imik nammineq aningaasaliissuteqarnissaq piumasaqaatigineqassaaq.

Tuniseqqinnermi piumasaqaateqarneq

§ 10. Naalakkersuisut tapiissuteqarsinnaapput angallatip imaluunniit suliniummi pigisat tunniunneqareerneranniit ukiuni qulini siullerni tunineqannginnissaat piumasaralugu. Qinnuteqartoqareerneratigut tapiissutit utertillugit akilerneqareernerisigut tunisinissaq Naalakkersuisut akuerisinnaavaat.

Imm. 2. Kisiannili Naalakkersuisut akuersissutigisinnaavaat tapiiffigineqartup, angallat suliniummilu pigisat tunisinaagai, piginnittoq nutaaq § 4 malillugu tapiiffigineqarnissamut piumasaqaatit naammassippagit suliniummillu allaaserinninnermik nassiussippat kiisalu § 4, aamma 5 malillugu uppernarsaatit nassiussippat.

Imm. 3. Imm, 2 malillugu angallammik suliniummilu pigisanik tunisinnermi tapiinnermi piumasaqaatit allangortinnagit ingerlaqqissapput. Tapiissuteqarnissamut piumasaqaatit piginnittup nutaap akuerisussaavai.

Uppernarsaasiisarneq

§ 11. Naalakkersuisut tapiissutit tigusisoq uppernarsaatit tunniussinissamik piumasaqaateqarfigisinnaavaat, taassuma ataani ukununga uppernarsaatit:

- 1) Suliniummi aningaasaqarneq, aningaasartuutit suut suliniutip piviusunngortinnerani aningaasartuutaasimanersut ilanngullugit.
- 2) Suliniummi tunisassianit aningaasat isertitat.
- 3) Tuniseqqissinnaanermi piumasaqaatit atuutsillugit ukiumoortumik naatsorsuutit.

Kapitel 5

Tapiissutit utertitsilluni akiliineq.

§ 12. Tullinnguuttunik pisoqarpat tapiissutit utertillugit akilerneqarnissaannik Naalakkersuisut piumasaqarsinnaapput:

- 1) Tapiissutinin tiguisoq qinnuteqarnermini pingaarutilinnik eqqunngitsunik paasisstissiisimappat.
- 2) Tapiissutinin tiguisoq § 11 naapertorlugu peqqussutinin nalunaarutigineqartunik malinnissimangippat.
- 3) Tapiissutinin tiguisoq suliniutip ingerlanneqarnerani piviusunngortinneqarneranilu suliffeqarfimmillu pitsaasumik ingerlatsinermit atuuttunik annertuumik sumiginnaappat.
- 4) Tapiissutinin tiguisoq tapiinermi piumasaqaatinik piumasaqaatinillu sumiginnaappat.

§ 13. Imatut pisoqarpat tapiissutit utertillugit akilerneqarnissaat Naalakkersuisut piumasarisinnaavaat:

- 1) Tapiissutinin tiguisoq ingasattumik sumiginnaasimaneq pissutigalugu akiliisinnaajunnaartutut nalunaarutigineqarpat.
- 2) Tapiissutinin tiguisup suliniut tuneqqissimappagu.
- 3) Suliniut tapiiffigineqartoq ingerlatsiveqatigiiffimmit allamit tiguneqarpat imaluunniit piumasaqaatit tunngavigineqartut sinnerlugit pilersaarummut tunngatillugu piginnittuusut annertuumik allanngorpata.
- 4) Tapiissutinin tiguisoq aalisarsinnaanermut akuersissummi piumasaqaatit imaluunniit aalisarnermi suliniummiluunniit pisortat akuersinerminni piumasaqaataannik naammassinnissinnaajunnaarpat.

Kapitali 6

Aalisariutinin isaterinissamut tapiissutit pillugit aalajangersakkat.

§ 14. Sinerissap qanittuani aalisarnermi aalisariutinin isaterinermut Naalakkersuisut tapiissuteqarsinnaapput, siunertamut pineqartumut ukiumut aalajangikkamut aningaasanut inatsimmi immikkoortinneqarsimasut sinaakkuserneqarnerisa iluani.

Imm. 2. Tapiissutit tunniunneqarsinnaapput angallat imaalippat:

- 1) aalisariutinin nalunaarsuiffimmi nalunaarsorsimappat imaluunniit Angallatinik nalunaarsuiffimmiippat aammalu Aalisarnermut, Piniarnermut Nunalerinermullu Aqutsisoqarfup angallatinut aalisarnermik inuussutissarsiornermut akuersissutilinnut nalunaarsuiffiani nalunaarsorsimappat,
- 2) angallatip allagartaa malillugu angissusaa 5 BRT/ 8 BT qaangersimappagu taamaattorli 75 BRT/120 BT ataallugu angissuseqarpat
- 3) ukiunik 25-nik pisoqaassuseqarpat pisoqaanerullunuunniit, aammalu
- 4) ukiut marluk kingullit nunatsinni aalisarnermi aalisaqataasarsimappat.
- 5) Qinnuteqarnermi ukiuni siuliini marlunni pisassat allanut nuussisoqarsimangippat. Tamanna atuupportaaq, pisassiissutinit pigisat tamakkerlugit ilaannaannilluunniit nuussisoqarsimappat.

Imm. 3. Angallammut pisortat taarsigassarsisimassagaluarpata tapiissuteqarsimassagaluarpataluunniit, imm. 1 naapertorlugu tapiissutit aatsaat pisortat taarsigassarsisitsisimanerisa tapiissuteqarsimanerisalu kingorna ukiut qulit qaangiuppata tunniunneqarsinnaapput.

Imm. 4. Qinnuteqaatip tunniunneqarneranut piffissaq aamma qinnuteqartut arlallit tamarmilluunniit isaterinissamut tapiissutisinissamut piumasaqaatinik naammassinnikkaluarpata § 17, imm. 1-mi taaneqartup aalajangersimasumik naliliineq aallaavigalugu tapiissuteqarnissamut aningaasat qaqugukkulluunniit uninngasuutigineqartut eqqarsaatigalugit aamma isaterineq tapiissuteqarnissamullu naleqqussuseq aallaavigalugu qinnuteqartut ataatsimiititaliap tullerriaarsinnaavai.

Imm. 5. Imm. 4-mi taaneqartutut pingaarnersiuerit makku tunngavigalugit piumasaqaatigineqassapput:

- 1) Angallatip pisoqaassusaa aamma tonnage,

- 2) angallatip siorngatigut pisisimasai,
- 3) Angallatit amerlassusaat imaluunniit sumiiffinni assigiinngitsuni akuersissutaat aamma
- 4) piffissaq qinnuteqartup pigittuuffigisimasa.

§ 15. § 34 Tapiissutit annertussusaat Naalackersuisut tunngavissatut aalajangersagaat aallaavigalugit angallatillu oqimaassusiat BRT imaluunniit BT aallaavigalugit naatsorsorneqassapput. Angallat ukiunit 25-nit pisoqaaneruppat tapiissutigineqartartut angallatip pisoqaliartornera malillugu ukiumut 5%-imik appartinneqartassapput, taamaattorli annerpaamik 50 %-mik.

Imm. 2. Isaterinissamut tapiissutit amerlanerpaamik angallatip nalingata 100 %-nik annertussuseqarsinnaapput.

Imm. 3. Angallatip nalinga nalilersuisartumit arlaannaannulluunniit attuumassuteqanngitsumit Aalisarnermut, Piniarnermut Nunalerinermullu Naalackersuisoqarfimmit toqqarneqartumit aalajangersarneqassaaq. Nalilersutitsinermi aningaasartuutit qinnuteqartup akilissavai.

Imm. 4. Sillimasiinermi aningaasat, isaterinissamut qinnuteqarnermiit ukioq ataaseq sioqqullugu angallammi imaluunniit motorimi ajoquserneq pissutigalugu tunniunneqarsimasut tapiissutit tunniunnerini ilanngaatigineqassapput, sillimasiinermi aningaasat angallatip iluarsarneranut atorneqarsimanngippata. Taamatuttaarlu sillimasiissutit qinnuteqarnerup kingorna ajutoorneq pissutigalugu sulili tapiissutit tunniunneqanngitsut akiliutigineqartut ilanngaatigitinneqassapput.

§ 16. Isaterinissamut tapiissutit tunniunneqartinnagit angallat isaterneqareersimassaaq.

Imm. 2. Isaterineq isaterivissatut Aalisarnermut, Piniarnermut Nunalerinermullu Naalackersuisoqarfimmit akuersisaasumit ingerlanneqassaaq.

Imm. 3. Tapiissutit tunniunneqartinnagit angallatip aalisariutinik nalunaarsuiffimmit umiarsuarlut nalunaarsuiffimmiittumit imaluunniit Angallatinik nalunaarsuiffimmi aammalu Aalisarnermut, Piniarnermut Nunalerinermullu Aqutsisoqarfup angallatinut aalisarnermik inuussutissarsiornermut akuersissutilinnut nalunaarsuiffiani nalunaarsorsimanera peerneqassaaq.

Imm. 4. Isaterinissamut tapiissuteqarnermi piumasaqaataavoq, piginnittoq akuersissuteqarnermiit ukiuni kingullerni tallimani pisassat ilaannik tamakkiisumilluunniit nuussisimassanngitsoq Tapiissutisusup pisassiissutinit pigisaminit piffissami tassani tuniniaappat, Naalackersuisunit inatsimmi § 12 imm. 1 nr. 4 naapertorlugu tapiissutit uterteqquneqarsinnaapput.

§ 17. Isaterinissamut tapiiffigitinnissamut qinnuteqaatit suliami aalajangiisussamit ataatsimiititaliamit Naalackersuisunit pilersinneqartumit inaarutaasumik allaffissornikkut suliarineqassapput.

Imm. 2. Naalackersuisut ataatsimiititaliamut ilaasortat tallimaasut toqqassavaat, tassunga ilanngullugu siulittaasoq. Ilaasortat sisamat, taakkunanga KNAPK-mit marluk, Kalaallit Nunaanni Sulisitsisut Kattuffianiit, imaluunniit kattuffimmit tamakkununga attuumassuteqartumit ataaseq kiisalu Aalisarnermut, Piniarnermut Nunalerinermullu Naalackersuisoqarfimmit ataaseq, inassuteqartoqarneratigut toqqarneqassapput. Ataatsimiititaliaq allatseqarnikkut Naalackersuisunit sullinneqassaaq. Ataatsimiititaliaq suleriaasissamik suliaqassaaq taannalu Aalisarnermut, Piniarnermut Nunalerinermullu Naalackersuisumit akuerineqassaaq.

Imm. 3. Isaterinissamut tapiissutit pillugit §-it 14, 15 aamma 16-imi malittarisassat tunngavigalugit Naalackersuisut malittarisassanik erseqqarinnerusunik aalajangersaassapput, tassunga ilanngullugu

qinnuteqaatit, tapiissuteqarnissamut piumasaqaatit, tapiissutininik naatsorsuineq, annertussusiliineq kiisalu tapiissutininik tunniussineq, paasissutissat nakkutilliinerlu pillugit aammalu tapiissutit il.il. atorunnaarsinneqarsinnaaneri utertillugillu akilerneqarsinnaaneri pillugit ilanngullugit. Isaterinissamut tapiissutit utertinnissat pillugit aalajangersakkanut § 12, nr. 1 aamma 4-mi aalajangersakkat atuupput.

Kapitali 7

Ataatsimut aalajangersakkat

§ 18. Tapiissuteqarnermi allaffissornermilu ingerlatsinerlutik malittarisassanik Naalakkersuisut aalajangersaasinnaapput, tassunga ilanngullugit:

- 1) Suliniutit suut tapiiffigineqarsinnaanersut.
- 2) Nunami sumiiffinni tapiissuteqartoqarsinnaanersaq.
- 3) Inuussutissarsiutitut immikkoortut suut tapiiffigineqarsinnaanersut.
- 4) Ilinniartitaanerlutik, aningaasaqarnerlutik teknikumillu tunngasutigut qinnuteqaateqartunut pilersaarutinullu piumasaqaatit.

Kapitali 8

Pineqaatissiisarnerit

§ 19. Imaalisoqartillugu akiliisitsisoqarsinnaavoq:

- 1) Pissutsinik § 12 naapertorlugu tapiissutininik utertitsilluni akiliinissamik kinguneqartumik unioqqutitsineq.
- 2) Pisortanut eqqunngitsunik paasissutissiineq, takukkit §-it 4 aamma 14.
- 3) §-it 11 aamma 16 naapertorlugit maleruagassatut aalajangerneqartuni piumasarineqartunut naammassinninnginnerit.

Imm. 2. Suliffeqarfik tamakkiisumik ilaannakortumilluunniit naalagaaffimmit, Namminersornerullutik Oqartussanit pigineqartoq, kommune imaluunniit kommunimi ataatsimoorussaqaq kommunalbestyrelsit aamma nunaqarfinni aqutsisut il.il. pillugit inatsisartut inatsisaata ataaniittoq, aktieselskabi, anpartsselskabi, andelselskabi assigisaalluunniit unioqqutitsippata suliffeqarfik assigisaallu pinerlunnermi inatsisit naapertorlugit akisussaatinneqarsinnaavoq. Tamattutaaq atuuppoq Namminersorlutik Oqartussat, kommuni imaluunniit kommunit ataatsimoortut, kommunalbestyrelsit nunaqarfinnilu aqutsisut il.il. pillugit Inatsisartut inatsisaanni pineqartut, unioqqutitsisuusimappata. *imm. 3* Malittarisassani Inatsisartut inatsisaat manna malillugu aalajangersarneqartuni aalajangersarneqarsinnaavoq malittarisassanik unioqqutitsineq akiliisitsinerlutik kinguneqarsinnaasoq.

Imm. 4 Malittarisassani Inatsisartut inatsisaat manna malillugu aalajangersarneqartuni suliffeqarfiup, tamakkiisumik ilaannakuusumilluunniit naalagaaffimmit pigineqartup, Namminersorlutik Oqartussat, kommunip kommuninilluunniit ataatsimoortut, kommunalbestyrelsit nunaqarfinnilu aqutsisut il.il. pillugit Inatsisartut inatsisaanni pineqartut, aktiaateqarluni ingerlatseqatigiiffiup, pigineqataassuteqarluni ingerlatseqatigiiffiup, pigisaqaqataalluni ingerlatseqatigiiffiup assigisaataluunniit unioqqutitsineranut akiliisussanngortitsisarneq pillugu malittarisassanik aalajangersaasoqarsinnaavoq. Taamatutaaq Namminersorlutik Oqartussanit, kommuninit imaluunniit kommunit ataatsimoortunit,

kommunalbestyrelsinit nunaqarfinnilu aqutsisunit Inatsisartut inatsisaanni ataanni, unioqqutitsinernut akiliisussanngortitsisarneq pillugu malittarisassanik aalajangersaasoqarsinnaavoq.

Atortuulerfia

§ 20. Inatsisartut inatsisaat una atortuulissaaq ulloq 15. decembari 2006.

Nunap immikkoortuisa kommunillu nutaamik agguarneqarnerisa kinguneranik aalisarnermi nunalerinermilu Inatsisartut inatsisaata aamma Inatsisartut peqqussutaasa assigiinngitsut allanngortinnissaanut Inatsisartut inatsisaat nr. 11, 5. december 2008-meersoq. (Kalaallit Nunaata nunap immikkoortuinut kommuneqarfinnullu aggorneqarnera pillugu inatsisartut inatsisissaata kinguneranik allannguutit (UKA 2008/62) imatut atuutilertussanik aalajangiisoqarpoq:

§ 2

Inatsisartut inatsisaat atuutilerpoq ulloq 1. januar 2008.

Aalisarnermut aningaasaliissutinut immikkoortitat pillugit Inatsisartut inatsisaata allanngortinneqarnera pillugu Inatsisartut inatsisaat nr. 13, 2. december 2009-imeersoq (Angallatinik pisoqqanik sequtserinissamut tapiisarnermik atuutilersitsineq aamma angallatinik nutarterinermi tapiissutinik qaffaaneq)

§ 2

Inatsisartut inatsisaat atuutilerpoq ulloq 1. januar 2010-mi.

Aalisarnermut aningaasaliissutinut immikkoortitat pillugit Inatsisartut inatsisaata allanngortinneqarneranik Inatsisartut inatsisaat nr. 22, 22. november 2011-meersoq (Tapiisarnermut tunngavissanut allanngortitsineq)

§ 2

Inatsisartut inatsisaat ulloq 1. januar 2012-imi atortuulissaaq.

Aalisarnermut aningaasaliissutitut immikkoortitat pillugit Inatsisartut inatsisaat (isaterinermit akuersissutit annaaneqartarnerat pinnagu)^[1] imatut atuutilersitsinermit aalajangersagaqarpoq.

§ 2

Inatsisartut inatsisaat ulloq 1. juli 2012-imi atulersinneqarpoq.

Aalisarnermut aningaasaliissutitut immikkoortitat pillugit Inatsisartut inatsisaata allanngortinneqarnera pillugu Inatsisartut inatsisaat nr. 26, 9. december 2015-imeersoq (Isaterinermit aalisarsinnaanermut akuersissutit pisassiissutitillu piginniinnartarneq kiisalu isaterinermit il.il. tapiissutit uuttortaasarnermit aalisariutip piviusumik nalinganik atuineq)

§ 2

Inatsisartut inatsisaat 01.01.2016-imi atuutilersinneqarpoq.

Aalisarnermut, Piniarnermut, Nunalerinermit Imminullu Pilersornermut Naalakkersuisoqarfik, ulloq 18.
September 2025

Emanuel Rosing (atsior.)
Naalakkersuisoqarfup pisortaa

/ Thomas Rassing (atsior.)

[\[1\]](#) Inatsimmut allannguut § 16, imm. 3-4-mut tunngavoq

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut